

Ola Todolo Lekemo



Ola Todolo Lekemo

Boku imu ibimu "Ola Todolo Lekemo." Tuku-
du na pulu ugu mare ou liridu. Pe na boku Bae-
pollo kanopo pulu ugu nibe tubi tilimo ugu lupa-
ma na lipu manie torudu. Boku Baepollona ugu
tubi nili lekemo pilipulie teridu. Ene ugu imu
kanokolie ugu pulu we we teko piliegi nibu teri-
du. Pe ene Gotega konopu tubi tiku piligi.

Gotega ugu ola lepa manie orumu. Gotega ulu
pulumu wakana kolkomele yaboma kanoge kinie
ene olo teba. Yabomane ulu pulu kerime liku
bulu tiku toko manie mudugi kinie Gotene yuga
ulu pulu lipe ora tibe. Ene Jisase Koraiti tikubu
lemo na lipe lijili molemo nigu piligi kinie ene-
ga mudu mogona Gotega konopu peaga wedo oba.
Enega konopu purele nibe.

Ou koro lupa 1937 kinie na aku teridu. Alieli
alieli Gote na nodopa molopalie konopu paa pea-
ga tilimo. Olto konopu teluna pulimo. Kinie ene
pepea Gotega talapena tukudu wayo. Nane mawa
tepo nikiru. Ou tukudu ogiliemo kapola nakolo
naa ogiliemo kinie wale Gotega talapena tukudu
wayo, nikiru. Na kodo tekemona nikiru.

GOTENE YABO KONOPU MOJIKIMU

Jane 3:16 Gotene yaboma konopu mojipelie, yuga malo telumu lipe tirimumuni yabo namelene yu tikubu konopu tigiliemo, yabo akuma kamu keru naa lege nakolo, alieli mololi ulu pulu ligi.

Romane 5:8 Olio ulu keru peli yabo molorumulu kinie Koraitini olioga kolojirimu. Aku terimumuni Gotene olio konopu mojimomomo lipe ora tirimu.

Jane 13:1 Kanopa oba purumu wale lagi norigi kokele orumu kinie, Jisase yu ma kolia mudupa kelepaya Lapa kinie puba wale orumu, pilirimu. Yu alieli yuga mana yaboma konopu mojipe molorumumu, kanagi, nibe kamu lipe ora tirimu.

Repellete 1:5 Jisase Koraitini ugu tubi tipe nibe tipelie, kubi lepa kilu topa wedo oba mana kigimaga mulimuli molorumu. Yuni olio konopu mojipelie, yuga mememone olioga ulu pulu kerime kulu topa ele tejirimu.

Jerimai 31:3 Nomimumuni koro lupa oba nado nibelie, "Tike. Nane nu alieli alieli konopu mojipu moleo," nirimu. "Aku teleomone na nu kinie ka lejikiru," nirimu.

GOTE JISASETOLO UBU TELU MIDI

Mateyu 1:22,23 Ou Ailimuni Gotega ugu yado nijirimu. Yemado ugu te nimumu kinie tikubu wedo okomo. Gotega ugu yado nijirimu yemone itipe nirimu: "Pilieyo. Abo wenepo ye naa puli te ulka pepalie, kago te meba," nirimu. "Kago akumuga ibimu Imeniuelle nigi," nirimu. Ibi akumuga pulu, Gote olio kinie pea molkomo.

I Timoti 3:16 Ugu telupa naa peba. Mini Pora Pulimuga ulu pulu midili tipu pilkimulu. Gotene yabomaga kalu lipe mona molorumu. Mini Kapi Telimuni yuga pulu tubi nilimu piliegi, nibe lipe ora tirimu. Ejollomane yu kanorigi. Yuga ugu peaga yabo wemado nigu tirigi. Mana yabo, yu tikubu, konopu tiku pilirigi. Gotene epena kolia-na olado lirimu.

Jane 14:9,10a Jisasene yudu nibelie, "Pillipi wale atili na nu kinie pea molgoro nakolo, nuni na pilku ibi naa tikinu," nirimu. "Yabo naene na kanopo ibi tikimumu naga lanie kanakomo," nirimu. Nuni nabemuna nigulie, "Naga lapa enedo liku ora ti nikinui," nirimu. Na naga lapa kinie molio kepe naga Lapa na kinie molemo. Ugu akumu tikubu nigu naa pilikinui," nirimu.

Jane 1:1 kinie 14 Ou pulu pulu Koraiti molorumu. Koraiti Gote kinie pea molorumu. Koraiti yu Gotela molorumu. Pe tike, Koraiti yabo kalu lipe olio kinie molorumu. (Olio yuga todolo kanorumulu. Lapaga malo telumu yuga Lapaga todolo lirimu.) Yu ulu pulu kape teli abolopa ulu pulu tubi nili abolorumu.

JISASE GOTEGA MALOMO

Aisea 9:6 Kago te meba. Gotene yuga malomo oliodo tibe. Yuni pege mumu tepa moloba. Yabomane nigulie, "Yu Ailimu, Mane Tili. Yu Gote paa todolomo. Lapamo alieli molemo. Opa tabululimu" nigu, nirigi.

Lluku 1:35 Ejollomone aju nibe itipe nirimu: "Mini Kape Teli nu kinie oba kepe Gotega todolo ailimu nu kinie oba aki toba. Aku tebamone kago menimu kago kape teli, niggi. Kago akumu Gotega malo," nirimu.

Mateyu 17:5 Yu ugu nibe molorumu kinie kupa kake teli, miriyeariye teli teluri obalie, ene pakojirimu. Pakojirimu kinie kupa akuna ugu te wedo obalie, itipe nirimu: "Ye imu naga malo. Nane yu kanopo ajikiru. Yuga ugu pilieyo," nirimu.

I Jane 4:15 Yabo naene Jisasega tamane tojipelie, Jisase Gotega malo aju nibemo yabo akumu kinie Gote moloba kepe, yu Gote kinie moloba.

Kollati 2:9 Koraiti Jisase kinie Gotega melema pepea yuga kaluna peke lekemo.

JISASENE YUGA PULU LIPE ORA TIRIMU

Jane 11:25 Jisasene abomodo nibelie, "Nane kilu toko wedo wagi, nilimu kepe, mololi ulu pulu tiliomo na," nirimu. "Yabo naene na tikubu, konopu tipe lipe meba adobamo, kolou koloba nakolo, altopa moloba," nirimu.

Jane 13:13 Enene nado nigulie, "Mane tili, nigu, Ailimu, nigu tekemele akumu kapola. Na akutipela," nirimu.

Jane 6:35 Jisasene enedo nibelie, "Na burete kepe mololi ulu pulumu. Yabo nae na kinie obamo egele naa koloba kepe, yabo nae na konopu tipe meba adobamo wakane naa koloba," nirimu.

Jane 8:23 Jisasene enedo nibelie, "Ene ya manie yaboma. Na ola yemo. Ene ya ma kolia pulu yaboma. Na ma kolia pulu yere molo," nirimu.

Jane 8:58 Jisasene enedo nibelie, "Na tikubu

nikiru. Eporame naa molopili, na ou molorudu," nirimu.

Jane 9:5 "Na ya ma kolia molgoro kinie na ma kolia paa tejilimu molgoro," nirimu.

Jane 10:7 Akinie Jisasene enedo altopa nibelie, "Na tikubu nikiru. Na kogi sipisipimaga pala kere pulumu molgoro," nirimu.

JISASENE GOTEGA TODOLO MARE LIPE ORA TIRIMU

Mateyu 14:19-21 Yuni yaboma era polona manie molagi nibelie, burete 5 kinie oma 2 lipelie, yu muluna olado tipe kanopalie, age nibelie, burete poko puka maka lepalie, yuga lobili origimene liku mego pukulie, yaboma tirigi. Yaboma pepea lagi nogo olo tejirigi kinie mare kakena lerimu-ma likulie kariye wale 12 poga lakilirigi. Ye lagi nogo molorigima 5000 mele. Abo kago kepe akuma kabu naa torigi.

Lluku 5:4-6 Yu ugu nibe pora tipelie, pe yu Saemedo itipe nirimu: "Olio wili no muru lekemokodo pamili. Akudu pumulu kinie enega oma limili walemu akuna manie mudukulie, oma liegi," nirimu. Saemone yu aju nibelie, "Nokoli, kinie ipulelimuga olio pepea pupulie, kogono midili tipu tepo temulu. Oma te naa limulu na-

kolo, nu nkinu kinie oma limili wale manie mudabo," nirimu. Ene aku terigi kinie ene oma atili lirigi. Enega oma lirigi walemu tugu nirimu. Mateyu 20:30 kinie 34 Pilieyo. Ye talo mogo tupi torumutolo aulka puluna nodoko molkolie, elte Jisase okomo, nirigimu pilkukulie, elte todolo teko waltikukulie, itiku nirigili: "Ailimu, Depetega malomo, nuni olto kodo kolani," nirigili. Jisasene elte kodone kolopalie, yuga kimuni eltega mogona pajirimu kinie ena telu wale eltega mogo oba peaga lerimuna, yu purumu mele elte lobili purigili.

JISASE KORAITI YU AILIMUNI MELEMA KALOPA LIRIMU

Kollati 1:16 Yu yuni midi melema pepea ma kolia lepili nibe tepa mimi tepa mulu kolia lepili nibe tepa mimi terimu. Melema pepea mona lekemo kepe, mele pepeama mona naa lekemo akuma, tepa mimi terimu. Ye ailime kepe, kigimaga nokokomele koliaama kepe, gapomano kepe, todoloma pepea, melema pepea mimi terimuna, yuga midi lekemo.

Ipiruti 1:2 Mini Pora Pulimuni wale akili lepa okomoma kinie yuga Malomone oliodo nibe tili-mo. Yuga malomone ma koliaama tepa mimi

terimu kepe, "Pe yu melema pepea lipili," nirimu.

Ekese 2:36 Nakolo Itillaiti yaboma pepea piliegiko. Gotene nibelie, "Jisase enene toko kojirigi kanumu na lipu Koraiti enega Ailimu molopili," nirimu.

Romane 14:9 Koraiti yuni kololi yabo kepe kode yabomaga Nokolimu molabo, nibe kolopalie, kilu topa wedo oba kode molemo.

I Koridi 1:9 "Gote molopa kojilimomone yuga Malo Jisase Koraiti olioga Ailimu ene kinie konopu teluna pupili," nirimu.

I Jane 1:3 Melema pepea yuga todolomone wedo orumu. Mele pepeama todolo tene lupa wedo naa orumu. Molo! Yuga todolomone midi wedo orumu.

JISASE KORAITI KOTE TEBA

Mateyu 25:32 Yabo pepeama puku yuga kubikerena mologe kinie yuni yaboma apurupalie, kogi tipitipi nokolimuni kogi tipitipime lipe ekedo mudupa kogi memema lipe ekedo muduku telemele mele teba.

Jane 5:22 Kapola kepe Lapamone yabo tega kote

naa pajijilimu. Kote kepe kogonoma pepea yuga malomodo koro tipe pora tirimu.

Ekese 10:42 Gotene oliodo nibelie, "Ene ugu todolomo yabomado nigu tieyo. Nigu tikulie, Gotene nibelie, "Jisase yuni kode yabo kepe kololi yabomaga kepe kote tejibe nirimu, nieyo," nirimu.

Romane 2:16 "Wale akinie Gotene Jisase Koraitini yabomaga ulu pulu teko kulkulimilime kano-pa ibi tibe. Jisasega ugu peagama itipe mane tilimu nikiru," nirimu.

2 Timoti 4:1 Na Gote kepe Jisase Koraiti olioga Ailimuga kubikerena agilipulie, nudu todolo nikiru. Jisase Koraiti oba molopa ma kolia nokoba kinie yu kode yabo kepe kololi yabo kepe kote teba.

Romane 14:10 Olio pepea Koraiti kote teba kolia pupu molomolo kene nu nabemuna nuga agenu kinie kote tejikinu, molo nu nabemuna nuga agenu mele we au tikinu.

JISASE MIDI OLIOGA TEPA LILIMO

Jane 10:9 "Na ulka kerepulu mele. Yabo te na kinie obalie, oba tuku pumuliemo, Gotene yabo

akumu tepa libe. Libe kinie yabo akumu tuku pupa pena oba lagi kanopa libe," nirimu.

Jane 14:6 Jisasene Tamasedo nibelie, "Na aulka kepe, ulu pulu tikubu kepe, mololi ulu pulu kepe," nirimu. "Yabo te aulka tega lupa naga lapa kinie pubado oba naa puba," nirimu. "Na kinie midi oba," nirimu.

Kollati 1:12-14 Olio Lapa Gotedo age nibu molkomolo. Yuni olio tepa tubi tirimuna olio Gotega kape teli yabo pa telina molemelemaga mele peagama kinie kapola limulu. Olio ou kolia tubulu tolina molorumulu. Gotene kanopalie, olio wedo lipe yuga Malo Kodo Telimoga talapena mojirimu. Yuga malomoga mememone olio lipe lejirimu. Olioga ulu pulu kerime kanopa kode tejirimu kepe.

Ekese 4:12 Olio tepa libemo telupare naa molkomo. Gotene ma koliana telu midi tirimu akumu kinie tepa lili ulu pulu limili.

Ipiruti 7:25 Yu molopalie, enega arega alieli tojilimomone yaboma yu kinie Gotedo olemelema, kapola kamu kamu tepa limo.

Lluku 19:10 "Yabomoga Malomone oba tiki polko molkomele yaboma adopa koropa tukudu libedo okomo," nirimu.

Repellete 5:9 Akinie ene konana kode nigulie, "Yabomane nu toko kojirigi. Toko kojirigi kinie nuga mememone olio pame teko Gotedo tirinu. Olio yabo ubu lupa lupama kepe, ugu lupa lupa nikimuluma kepe, talape lupa lupa molkomoloma kepe, gapomano lupa lupamaga yaboma kepe, nuni pame teko Gotedo tirinu," nirigi. "Aku terinumuni nuni boku kapola likulie, taipi tiku wedo liku kanani, nigi," nirimu.

Ipiruti 5:9 Yu kogono tepa pora tirimu kinie yuga ugu tege pajikimili yabo pepeamado alieli tepa lili ulu pulu pulu mojipe tirimu, tikimu.

Jane 8:24 "Nane enedo nikirumu enega ulu pulu keru pali kologemodo nikiru. Enene, na enega tepa lilimu molkoromo naa piligiliemo, enega ulu pulu kerima pepili kologe," nirimu.

Taitas 2:14 Yuni ulu pulu kerime pepea lepili nibe aju mudupalie, olio wedo lijirimu kepe yuga yabo puluma kogono peagama teperepe teko tegema kulumaye topa yuyuni libedo, olioga kojirimu.

I Koridi 1:30 Ene Koraiti Jisase kinie molkomele kinie Mini Pora Puliga kagabola molemele. Jisasene Gotega pilili ulu pulu lipe oliodo tilimo. Yuni olio tepa lilimo kepe ulu pulu kerime kulu tojilimo kepe, olioga kote pame tejirimu.

JISASE YUGA MEMEMONE OLIO PAME TEJIRIMU

Iptiene 1:7 Jisase yuga mememone olioga pame tejipalie, olioga ulu pulu kerime kanopa kode tejikimu. Yuga mele peagama konopu tipe yabomado we tilimona tekemo.

I Pira 1:18,19 Ene tubi tiku pilikimili. Ene ulu wema laniega ulu puluma piliku terigi kinie mele keru lebamo, puruba melema gollo mone kepe, tilligi mele kepe, mele akumane lipe ene pame tepa wedo lirimu molo. Koraiti kogi tipitipi walomo, kape teli kalaro naa peli, molopalie, yuga meme paa peagamone olio pame tepa wedo libedo tirimu.

Iperuti 9:14 Koraitiga mememoga todolo paa ogojipe lekemo. Yu kape teli tubi nilimomone yuyu Gotedo tirimu. Tirimumu mini kogonomoga alieli tedelamu mele Gotedo tilimo. Aku telemomone yuga mememone olioga konopu tukumina kulu topalie, ulu pulu oukudu kololime ele tejipalie, pe Gote kode molemomoga kogono tejiegi nibe, olio tepa todolo mudulimo.

Romane 5:9 Kinie yuga mememone olio tepa tubi tilimo, akutipe pe Yuni kamu mogo naa liegi, nibe abolopa ogojipe lakopa tepa libe.

Mateyu 26:28 "Imu naga mememo kadarake kodena pelemo. Meme imu yabo atilimaga ulu pulu keru kanopo kode tejibudo meme odo lebo," nirimu.

I Jane 1:7 Nakolo Jisase pa telina molkomo mele olio akutipu pa teli ulu pulu abolemelaje, olio pepea konopu teluna pulimolka. Akinie Jisase Koraiti Gotega malomoga mememone olioga ulu pulu kerime pepea kulu topa ele tejibe.

JISASE TEGE TIKIMULU KINIE GOTENE OLIO TEPA LIBE

Ipitiene 2:8, 9 Ene Jisase tege tikimilimuni Gotene konopu tipe yuga mele peagama yabomado we tilimomona ene tepa lilimo. Gotene tepa kamele akajibedo tilimo. Ene kogono teko naa ligi kene, enega kakara nigi aulka naa lekemo.

Romane 5:1 Olioga Ailimu Jisase Koraiti tege tikimuluna olio kanopa kode tekemo kene, olio Gote kinie konopu pureli nibe teluna pulimo.

Galletia 5:6 Olio Koraiti Jisase kinie molomololiemo, olio kalu karu limulu molo karu naa limulu, mele we mele. Ulu telu midi ulu yumo. Gote konopu moji pulie, yu kinie tege tipu molomolo akumu midi ulu yu.

Jane 20:31 "Jisase yu Koraiti, Gotega malo, ugu akumu piliku mego adani, nibu ugu imu bokuna tokoro," nirimu. "Jisase molkomona ene mololi ulu pulu kamu liegi," nibe tojirimu.

I Jane 5:4 "Gotene altopa merimumane mana ulu puluma toko manie mudulimili. Ene Gote kinie tikubu tege tikimilimuni mana ulu puluma toko manie mudukumili," nirimu.

Jane 6:28, 29 Ene yudu nigulie, "Olio nabe tepolie, Gotega kogono tepo molomoloje," nirigi. Jisasene aju nibelie, "Ene Gotega mudurumu-muga ugu tege pajiegi. Gotene, kogono akumu tejiegi," nibe tirimi.

GOTENE OLIO KODONE KOLEMO

Konana 103:11 Epena kolia paa ola lekemo. Akutipe mele Mini Pora Pulimuni yu popo tokomele yaboma kamu kodo aili kolkomo.

Taitase 3:5 Olio kogono peagama terimuluna Gotene kanopalie, lipe lejirimu mele molo. Yuni olio kodo kolumumuni olio lipe lejirimu. Olio kulumaye topalie, altopa meli none terimu kepe, Mini Kape Telimuni olio tepa kode mudurumu.

Konana 108:4 Nu yabo kamu konopu mojinino. Nuga konopu akumu paa ola pekemo. Nu tikubu nilinona ugu imu ogojipe lekemo.

Maika 7:18 "Gote nu todolo moleno. Numele nae molkomo. Nu ulu pulu keru kanoko kode teleno. Nuga kagabolama manie pukumili akuma nu kapola ola lilino. Nu yaboma konopu tiku konopu mojikinuna nuga konopuna mumidili alieli naa pelemo, " nirimu.

Konana 103:17 Yabomane Ailimu popo tolimilime Gotene ou walema pepea kepe pe walema pepea kamu kodone kolemo. Gotene yuga ulu peagama yabo akumaga kolepalidu pea tibe.

Llamita 3:22,23 Ailimuni olio kamu konopu mojikimu. Weje olio koro pora nilka. Olio kodone kolemo konopu akumu we pepili molkomo. Walemaga pepea konopu akumu kode pulimo. Yuni olio alieli pa kojipe molemo.

GOTENE OLIODO NIBELIE, "NA KINIE WAYO," NIKIMU

Aisea 1:18 Ailimuni nibelie, "Kinie wale na kinie wayo. Ugu nibu tobolamili. Enega ulu pulu

kerime kugu mele igi tipe pekemomo pe nane kulumaye tobo kinie ene mulu wabale kake teli mele mologe. Ene paa kodoli tepalie, meme mele temuliemo, ene ogo kogi tipi tipi kuledi mele mologe," nirimu.

Mateyu 11:28 "Ene kogono todolo tekemele kepe ubunane kolkomelema pepea kepe nado wayo. Nado ogi kinie, ene mulu piliegi nibu, kodili ti-bu," nirimu.

Aisea 55:1 "Ene wakane kolkomelema pilieyo. Ene nona wayo. Kou mone naa abolkomelemanane ogo kolko nayo. Paa tike. Puruti waini no kepe tutu kepe kou mone naa muduku, we lieyo," nirimu.

Repellete 22:17 "Minimu kinie ye puba abomo tolone wayo, nikibili. Ene ugu pilikimilimane wagi, nieyo. No wakane kolkomelema wayo. Mololi ulu pulu no liemili konopu legima we kolko nogo olo tejieyo," nirimu.

Jane 7:37 Ene lagi mogo norigimaga wale aili pora nibe wale wedo orumu kinie Jisasene ola molopalie, ugu todolo mudupa nibelie, "Ene te no wakane kologiliemo, na kinie ogolie, no nagi," nirimu.

YABO PEPEA GOTEGA KAGABOLA MOLO

I Jane 3:10 Gotega kagabola molemelema kepe Setenega kagabolama kepe ene kapola kanoko ibi tigi. Namelene ulu pulu tubi nili naa abolkolie, enega agenupilime konopu naa mojikimili yabo akuma Gotega yabo molo.

II Koridi 6:17,18 Ailimuni nibelie, "Ene wedo ogo lkerame molagi. Kalaro molemo ulu pulu naa abolayo. Akinie na Aili paa todolomone ene lipulie, enega Lanie molobo. Ene naga kagabolama mologe," nirimu.

Romane 8:14,15 Gotega Minimuni meba adolimo yabo akuma Gotega kagabola tikubu molemele. Ene likimili konopu akumuni ene ka tipe pipili pajibe kapola molo. Olio malo konopu likimuluna olio Gotedo, "Tara, Tara," nikumulu, nirimu.

Pillipie 2:15 "Ene adiki teko molko kojieyo. Gotega kagabola ulu keru naa peli molayo. Ene ya mana ulu keru peli karaye telimele yabo kinie molkomele nakolo, ene ma kolia tubulu toli na llame mele molkolie, paa tejieyo," nirimu.

Jane 1:12 Jisase lirigi yaboma, Jisase kinie tege tirigima pepea, Gotega kagabola molagi nibe yu todolo tirimu.

GOTE NO KERI NOKOMELEMADO NIKIMU

Romane 13:13,14 "Olio tagoli kinie molkomolo kene, olio pipili kolopo molopo kojiemili. Olio kara pupu deniti tepo no keru nobo kekelepa tomolo mele molo. Pipili naa pepili ulu kerinele we temolo mele molo. Jisase Koraitini ene aki topili, molayo. Kaluna konopumaga tege pajipu ulu mare temolo nigu altoko konopu naa kibu tieyo," nirimu.

Gelletia 5:19 kinie 21 "Kalumone ulu pulu tele-momo morekena lekemo. Itipe mele. Ulu kerinele we telemele kepe, ulu koropa keru we abolomele kepe, marake telemele kepe, konopu keru pajikimili kepe, yabo yagono toko kojikimili kepe, no keru nogo kekelepa tolemele kepe, kara pulimili kepe, ulu akuma telemelema kalumuni midi telemo," nirimu. "Ou na enedo mogo topo niridu kanumu altopo nikiru. Yabomane ulu pulu akuma tegema Gotega pege mumu telemo kolia-na naa pugi, nikiru," nirimu.

Porape 23:31,32 "Puruti waini no kodoli tepa migina yuyu adopa migimu kugu mele tejikimu kinie ene naa kanayo. Aku tipe mele wabiyemane yabo nolemele mele noba kepe wabiye alemoini yabo nolemele mele noba," nirimu.

Aisea 5:11 "Yabomane ipuleli ou ola molkolie, no keru noliku puku nogo ipu tigi kinie puruti waini ene tepa ebabo tibe. Apa, yabo akuma mogo ligi," nirimu.

PAPU TEKEMOLO NIGU TEKEMELE MIDI KAPOLA MOLO

Mako 10:17-22 Jisase aulkana puba purumu kinie ye tene lkitipe oba tamalu pepalie, itipe waltirimu: "Mane Tili peaga, na nabolka uluri tepolie alieli mololi ulu pulu libuje," nirimu. Pe Jisasene yudu nibelie, "Nuni nado nabemuna peaga niku," nirimu. "Yabo te peaga molo nako, Mini Pora Puli midi peaga," nirimu. "Nu llowama pilino. Yabo te toko naa kojieyo nirimu kepe, ki likimili ulu pulu toko pula naa tayo nirimu kepe, melema wa naa lieyo nirimu kepe, yabomaga nijilku ugu kolo naa tayo nirimu kepe, ugu kolo toko yabo marega melema we likimili akuma naa lieyo nirimu kepe, enega aminieli lanielime kinie molko kojieyo nirimu kepe nu pilino. Akinie yuni aju nibelie, "Mane Tili, na kago kelo wale ugu pulu akuma tege pajiridu kinie yado yado pajilio," nirimu. Pe Jesase ye akumu nemeneme nibe kanopa yemo konopu mojipelie, itipe nirimu: "Ulu teluri midi nu kinie kapola naa telemo lemo," nirimu. "Nu puku nu-

ga melema yabo mare pame teagi puku tipui," nirimu. "Mele yado linime yabo koropamado tieni. Aku teni kinie Mini Pora Puli molemo koliaana nuga mele peaga atili leba. Pe na lobili wani," nirimu. Jisasene ugu akumu nirimu kinie yuga kubikere kolopalie, konopu keru pajipe yu kelepa aju purumu. Yu mana melema atili notirimumuni ulu aku tepa purumu.

Mateyu 22:37-38 Jisasene yudu nibelie, "Nu Mini Pora Pulimu nuga Ailimu konopu mojie. Nuga konopu kepe, nuga todolo kepe, nuga pili-lime pepea akumane Gote konopu mojiku molayo. Llowa imu paa kubi lepa," nirimu.

Porape 16:25 Aulka te lemo akumu yabo kano-kolie, aulka imu peaga tubi nilimu nigu nikimili nakolo, aulka akumu kololi ulu puluna lepa tuku pulemo.

ENE LOU LIKU MOLOGE KAPOLA MOLO

Galletiye 6:3 "Yaboma mele we mele nakolo yabo tene, na aili nibelie, yabo yumu molgoro, nimuliemo, yabo akumu yuyu lou lipe molkomo," nirimu.

Jemese 1:22 "Nakolo ene Gotega ugu tege pajieyo. Enenedo kolo tokolie, komumuni midi piligi kapola naa teba," nirimu.

Ipitiene 5:6 "Ye tene enedo we ugu mare nibe ene tepa lou lijibe kapola molo. Ulu keru akuma telemelena Gotene llowa pula tolemele yaboma mogo lipe tibe," nirimu.

I Koridi 6:9, 10 "Yabomane ulu pulu tubi naa nilime abolomele akuma Gotega pege mumu telemo koliana naa mologemo, naa pilikimili. Ene lou ligi mele kapola molo. Ulu kerinele we telemelama kepe, kuru popo tolemelema kepe, ki likimili ulu pulu toko pula tolemelema kepe, yema ye yagono kinie ulu kerinele mele tekemelema kepe, wa nolemelema kepe, yama melelemelema kepe, no keru nogo kekelepa tokomelema kepe, marake teko kakara nilimilime kepe, yabo lupa-maga melema toroko likimilime kepe, yabo ubu aku tilime Gotega pege mumu telemo koliana naa mologe," nirimu.

I Jane 3:7, 8a "Naga kagabola wallokoloma pilieyo. Yabo tene ugu mare nibelie, ene lipe lou lijibe mele kapola molo. Ulu pulu tubi nili abolkomelema Gote tubi nilimo mele ene tubi nili molkomele. Setene ou ulu pulu kerime pulu mo-jirimuna ulu pulu keru abolkomelema Setenega yabo molemele," nirimu.

ULU PULU KERIMENE KAMU KOLOLI ULU PULU TILIMO

Porope 11:19 "Ulu pulu peaga abolemelema mololi ulu pulu ligi nakolo, yabo namelene ulu pulu kerime lobili pulimilime kololi ulu pulu ligi," nirimu.

Jemese 1:15 "Yama mekemelena ulu pulu kerime mekemo," nirimu. "Pe ulu pulu kerimene kogono tepa pora tipelie, kololi ulu pulu meba," nirimu.

Romane 8:6 "Ene kalu ulu puluma konopu moji-giliemo, ene kologe nakolo, ene mini ulu puluma konopu moji-giliemo, ene mololi ulu pulu kepe pureli nili ulu puluma ligi," nirimu.

Romane 5:12 Ene tubi tiku pilieyo. Ye telumuni ulu pulu kerime ya ma koliana tukudu lirimu. Ulu pulu keru tukudu lirimumuni kololi ulu pulu wedo orumu. Yabomane pepea ulu keru abolkomelena kololi ulu pulumu yabo pepea likimili.

Lluku 15:32 "Olio tae tepo konopu peaga pajipu molkomolo, imu paa kapola. Nabemuna, nuga agenu kolorumu nakolo, kinie kode molemo. Ou yu manie purumu nakolo, olio kanopo lejikimulu," nirimu.

Itikielle 18:20 "Yabo namelene ulu pulu keru tekemelema kamu kologe. Lapane ulu pulu kerimane temuliemo, malo mogo libe mele kapola molo. Malomone ulu pulu keru mare temuliemo, lapa mogo libemele kapola molola. Ulu pulu peaga abolemelemaga kaluna ulu pulu peaga peba. Ulu pulu keru telemelemaga kaluna ulu pulu keru peba," nirimu.

KORAITINI KOLOLI ULU PULU TOPA KOJIRIMU

Lluku 7:14, 15a Jisasene obalie, tarepola abolorumu. Abolorumu kinie merigi yemane we molorigi. Pe yuni nibelie, "Ye komijipu, nane nudu ola mola nikiru," nirimu. Nirimu kinie kololi yemone ola molopalie, ugu mare nibe molorumu.

Jane 11:43, 44 Jisasene ugu akumu nibe pora tirimu kinie yu ugu todolo tepa nibelie, "Llate-rete nu wedo oyo," nirimu. Nirimu kinie kolorumu yemo kibu kime maninie tukurini kumu torigimu palipeli wedo orumu. Yuga kubikere pea kumu toli perimu. Pe Jisasene yabomado nibelie, "Yu pupili, tilke tojiei," nirimu.

Jane 10:17, 18 "Naga mololi ulu pulu kelepo libudu tikiruna, naga lapane na konopu mojikimu.

Yabomane naga mololi ulu pulu toroko naa likimili nakolo, na nanuni tikiru. Naga mololi ulu pulu kapola tibu. Na kapola kelepo libula," nirimu. "Naga lapamone kogono imu tikimu," nirimu.

Repellete 1:18 "Na ou kolorudumu kode molio. Kamu kode molgoro kene, pilieyo. Nane kololi ulu pulu kepe tepe koliamaga kerepulu kime abolio," nirimu.

MINI PORA PULIMUGA LLOWAMA LEKEMO

Llowa 5:7-21 "Ene Gote telupa konopu naa mojieyo. Ene uju kou au tiku melema muluna ola lekemo kepe, mana manie lekemo kepe, nona tuku lekemoma kepe, au tikulie, popo tokomelemo naa tayo," nirimu.

"Enega Ailimu, Mini Pora Pulimuga ibimu we leko ajiku marake mele tege kapola molo. Ailimuni yuga ibi we legema kanopa kode naa teba," nirimu.

"Ailimuni ou mane tipe nirimu kene, enega we molagi walena koro molayo. Wale 6-ga kogono teko pora tieyo. Wale 7 kinie enega Ailimu Mini Pora Pulimuga we molagi wale lekemo," nirimu.

"Ailimuni mane tipe nirimu kene, enega ami-nieli lanieli molko kojieyo. Aku tegiliemo ene kapola molkolie, wale atili mologe," nirimu.

"Yabo te toko naa kojieyo. Ulu kerinele we tekemele akuma naa teayo.

"Melema wa naa lieyo.

"Yabo lupamaga kolo toko ugu nilinielo naa tejieyo.

"Ye lupamaga aboma yama mege kapola molo. Yuga ulka kepe, yuga ponie kepe, yuga kedemadede ye kepe, kedemadede abo kepe, yuga kogi pirimukao kepe, yuga kogi dogi mele kepe, yabo lupamaga imele yamele yama naa mejieyo," nirimu.

GOTENE NAA KANOPILI, LOPI TEMOLO MELE KAPOLA MOLO

Konana 139:8 kinie 12 "Na epena kolia pulkaje Gote nu akuna moleno. Na tepe koliana pupu polo telkaje nu akuna molenola. Nu kanokono kinie tubulu tolimu oba pa teli none tekemo. Nu kanokono kinie aiburumi oba ai tagoli mele pa tepa lekemo. Nu kanokono kinie tubulu tolimu kinie ai tagolimu tolo mele telu mele kanokono," nirimu.

Jopo 34:21-22 Mini Pora Pulimuga mogomane yabomaga aulkama kanopa ibi tipelie, yabomane telemele uluma pilipe pora tilimo. Kolia aiburumi kepe tubulu toli te naa lekemona ulu pulu kere telemelemaga lopi tege kolia te molo.

Jeremaye 23:24 Ailimuni nibelie, "Yabo te nane naa kanobo kolia poru tega yu kapola lopi tebae." Ailimuni nibelie, "Na epena kolia kepe, ma kolia kepe, koliaamaga pepea na naa molko-roe," nirimu.

Porope 15:3 Ailimuga mogomone koliaamaga pepea ulu peagama kepe, ulu kerime kepe kanopa kelepa molkomo.

Lluku 8:17 "Melema naa nigu tikimilime oba morekena leba kepe melema lopi telemelema oba mona leba kinie ene pepea kanoge," nirimu.

MINI PORA PULIMU LIKU TU TIKIMILI AKUMA KAMU MOGO LIGI

II Pira 3:7 Mini Pora Pulimuni nikimuna mulu kolia kepe ma koliatolo kinie we lekemo. Pe tepene noba. Gotene yuga kote aili wedo oba wale akinie yu liku tu tikimilime topa kamu kojibe. Akinie koliatolo tepena nobala.

Mateyu 25:46 "Yabo keru akuma aju puku ulu mogo kamu kamu ligi nakolo, yabo tubi nilime mololi ulu pulu tuku puku kamu kamu ligi," nirimu.

Mateyu 13:41,42 "Yabomoga Malomone yuga ejolloma muduba kinie ejollomane melema teko kekilimilime kepe yaboma ulu pulu keru telemelema kepe ene liku maku tokolie, Jisasega pege mumu telemo koliana naa molagi, nigu tepe polona mudugi. Akuna ene kana nigu ugu kinieroko ligi," nirimu.

Konana 9:17 "Ulu pulu keru telemelema kepe, Gote komu tilimili talapema kepe tepe koliana muduba," nirimu.

Mateyu 18:8 "Nuga kimuni molo nuga mokomone nu tepe kekilikaje te karu leko ele teani. Nu kogono naa teko aulka naa adoko molenaje, papu mele nakolo, ki talo ajiku moko talo ajiku molkolie, tepe koliana pulinaje, kapola molo," nirimu.

PE KOTE PEBA

Romane 14:12 Ene piliegi. Olio pepea yumelemele ulu mare terimuluma Gotedo para timulu.

II Pira 2:9 "Gote Ailimuni yuga ulu pulu abolkomelema Setenene kodi topa mada lekemoma Ailimuni kapola tepa libe nakolo, yuni ulu pulu keru abolkomelema, ulu mogo liegi, nibe nokoko molagi, nilimo," nirimu.

II Koridi 5:10 "Olio pepeama Koraitiga mogo palana Kote papu molomolo. Olioga puluma wale akinie morekena leba. Wale akinie Gotene olioga kaluna ulu mare telemoloma, peaga molo kerije, kanopalie, pudu toba," nirimu.

Ekese 17:31 "Gotene yabomaga kote tubi tipe teba walemo koro lipe notirimu. Ye tene, kote tejipili, nibe koro mojimimu. Mojirimu ye akumu yabo pepeamane, kanoko ibi tiegi, nibe ye akumu kolorumu kinie Gotene, kilu topili, nibe tepa ola mojimimu," nirimu.

I Jane 4:17 "Akumuni olioga konopu mojili ulu pulu oba kape tekemo. Kape tekemona olioga kote wedo oba wale akinie olio kamele kou pajipu molomolo. Nabemuna? Yu molkomo mele olio ya mana aku tipu molomolomone teba," nirimu.

Iperuti 9:27 Yaboma ou telu telu nigu kolkomele nakolo, pega kote peba.

JISASE KORAITINI OLIODO ULUMA OGOJIPE TELEMO

II Koridi 8:9 Jisase Koraiti, enega ailimuni uluma ogojipe ene kinie telemomo, pilikimili. Yu kamako molorumu nakolo, enega oba koropa pujirimu. Ene ogo kamako leagi nibe yu koropa purumu.

Ekese 4:33 Jisasene lipe mudurumu yemane, "Jisase kilu topa wedo orumu," ugu akumu, todolo muduku nigu tirigi kinie yabo wemane ene kanoko ajirigi.

Romane 5:15 Areme mogo lirimu nakolo, Gotene uluma ogojipe ene kinie telemo akumu ubu telu mele molo. Ye telu akumu kara purumuna yabo atili kololi ulu pulu likimili nakolo, Gotene uluma ogojipe ene kinie telemomone ulu akumu paa topa manie mudukumu. Jisase Koraiti ye telumuni midi yabo atilidu tepa kamele akojipe melema tirimu.

Romane 9:16 "Yabomane Gotega tepa lili ulu pulumu konopu mojiku ligi mele molo. Todolo muduku ligi mele kapola molo. Gotene yaboma kodone kolemona ligi" nirimu.

Taitase 3:7 "Jisasene uluma ogojipe olio kinie telemomone olioga uluma yuga ulu puluma kinie tepa kapola tejilimuna kamu mololi ulu pulu limulu, " nibu konopu tipu nokopo molkomolo.

II Koridi 9:15 Gote yuga mele peagamo (olio tubi tipu nimulu none naa tekemo) tirimumuni olio age niemili.

I Pira 5:5b Mini Pora Pulimuni kakara nikiimilime lipe bulu tilimo nakolo, adiki teko molemelema tieve ajilimo.

ENEGA KONOPU ALOWA TEAYO

Itikiyelle 18:31 "Ene ulu pulu kerime telemelemanega naga ugu toko pula tokomele ulu akuma toko manie mudayo. Ene konopu kode kepe mini kode kepe lieyo. Itirelle yaboma, ene nabemuna kologe, " nirimu.

Ekese 17:30 "Yaboma ou walu tiku molorigi kinie Gotene kanopalie, tiyene kolorumu. Nakolo kinie kolia pepeamaga yabo molkomelema, konopu alowa teayo, " nikimu.

II Koridi 7:10 Gotega ugu pilikulie, midili nogo konopu alowa tege kinie Gotene tepa libe nakolo, mana melemaga midi midili nogeliemo, kololi ulu wedo oba.

Mateyu 3:2 Janene nibelie, "Gotega pege mumu telemo uluma adi nodopo okomo kene, enega konopu alowa teayo," nirimu.

Lluku 13:3 "Na Jisasene enedo molo nikiru. E-nega konopu alowa naa tegiliemo, ene pea aku tiku kamu keru legela," nirimu.

Ekese 3:19 Ene konopu alowa teko, altoko topele toko yado waya. Aku tege kinie enega ulu pulu kerime kulu tojipelie, Ailimuni nodopa molopalie, enega mudu mogo tepa kodili tibe wale lekemo.

GOTENE OLIO KANOPA KODE TEKEMO

Mateyu 6:14 "Yabo lupamaga lawa tekemele ulu pulu akuma enene kanoko kode tegiliemo, enega lanie muluna ola molkomomone enega lawa telemele ulu puluma yuni kanopa kode tebala," nirimu.

Aisea 55:7 "Enega ulu pulu keru telemele aulka akumu muduku keliagi. Enega ulu pulu karaye telemele konopu akuma muduku keliagi. Pe ene kelko enega Ailimudu oge kinie ene kodone koloba. Olioga Mini Pora Pulimu kinie kelko ogiliemo, yuni enega ulu pulu kerime kanopa kode teba," nirimu.

Itikiyelle 18:21 "Yabo kerimene ulu pulu kerit tekemele pepeama ene liku bulu tiku naga ugu tege pajikulie, ulu tubi nili kape teli abologe kinie ene alieli mologe. Kolou naa kologe," nirimu.

Mako 2:5 Jisasene ene konopu todolo pajiku mego origi akumu kanorumu kinie, kibu ki mebu teli yemodo, "Naga malo, nuga ulu pulu kerime Gotene kanopa kode tejikimu," nirimu.

Ekese 5:31 Mini Pora Pulimuni yuga ki ubukuduna, "Jisase molopili," nibe ola mojirimu. Yabomaga Ailimu kepe tepa lili molopili, "nibe terimuni Itirelle yabomaga konopu alowa tepa enega ulu kerime kanopa kode teba," nirimu.

Repellete 3:20 Pilieyo! "Na Jisase kerepuluna agilipulie, topo kilukilu tikiru. Yabo tene naga ugu pilipelie, lkape tomuliemo, na tukudu oboyu kinie lagi nobo molobolo," nirimu.

MANA ULU PULUMA OKO LIKU MOLAYO

Ipitiene 5:11 "Ene ulu pulu kalaro mololi ko tolemoma naa abolayo. Ulu akuma olie polagi, nigulie, para tieyo," nirimu.

Kollati 3:2 Epena kolia ulu puluma konopu kibu tiku molayo. Mana melema molo.

Taitase 2:11,12 Mini Pora Pulimuga uluma o-
gojipe ene kinie telemomo morekena lekemo.
Yabo pepeama kanokomele. Olio tepa lili ulu
pulu akumuni oliodo itipe mane tikimu: "Mana
yama mekemele ulu pulu kepe Gote komu tiku
telemele ulu pulu akuma toko manie mudeyo.
Pe olio mogo topo molamili. Ulu tubi nili kape
teli ya mana molkomolo wale kinie abolayo,
mane tikimu," nirimu.

Aisea 1:16 Ene kulumaye tokolie, kape teli mo-
layo. "Ulu pulu kerime naga mogo pakana naa
pepili," nigulie, "kubi teayo. Ene ulu pulu kerime
muduku keliayo," nirimu.

I Jane 2:15,16 Ene mana konopuma kepe ulu
puluma kepe konopu naa mojieyo. Mana mele-
ma konopu mojikimilina Lapamoga konopu mo-
jikimu ulu pulu akuma ene naa pilikimili. Mana
melema yama mekemele kepe, mogomone kano-
ko liemili, nigu tekemele kepe, mogo kege te-
kemele ulu pulu akuma pepea, Lapamone naa
tilimo. Mana puluma pepalie, wedo okomo.

YABOMA ALTOPA MEKEMO

I Jane 2:29 Gote paa tubi nili molkomo piliki-
mili. Akumuni ene kapola piligi. Yaboma ulu
pulu tubi nili abolomele akuma Gotene merimu.

I Pira 1:23 Gotega ugu kode peli alieli lelemo akumuni olio altopa mekemo. Gotega ugu ubu akumu keru naa leba. Alieli leba akumuni olio mekemo. Ubu purubamone molo.

I Jane 5:18 Mini Pora Pulimuni altopa melemoma ulu kerime naa tekemele. Gote yuga Malomone yabo akuma tapu telemona mini kerimuni ene tibi tojibe mele kapola molo.

Jane 3:3 Jisasene yudu aju nibelie, "Nane nudu tikubu nikiru. Mini Kape Telimuni ene yaboma altopa naa memuliemo, Mini Pora Pulimuga pege mumu telemo koliana puku naa kanoge," nirimu.

Itikielle 36:26 "Nane mudu mogo kodere tibu. Konopu kode enega konopuna tuku mudubu. Ene-ga kaluna mudu mogo gelu nili kerimu wedo lipulie, mudu mogo peaga tibu," nirimu.

II Koridi 5:17 "Ye te Koraitiga kaluna molo-muliemo, yu ye kode molemo. Mele oukuduma pora nirimu. Pilieyo! Uluma kode midi oba peba," nirimu.

ULU PULU KERIME KOLORUMU. OLIO KORAITI KINIE KODE MOLKOMOLO

Ipitiene 2:1 kinie 6 Ene ulu pulu kerime kepe llowa toko pula torigimu kepe ulu akuma tekolie, kerilorigi kinie Gotene ene tepa kode lirimu. Tepa kode lipelie, yuni olio pege mumu tepa olado lipe olio Jisase kinie mojikimu.

Romane 6:2 kinie 11 Olioga mana ulu pulu kerimaga ibimu kolorumu yaboma molomululie, nabepo ulu pulu kerime altopo tepo molomolo. Ene ulu pulu keriloba kinie ene yabo kololi none teko molayo nakolo, Gote molkomo kene ene Jisase Koraiti olioga Ailimu terimumuni yabo kode nigu molayo.

Kollati 3:1 "Ene Koraiti kinie kilu toko olamogiliemo, Koraiti Gotega ki ubukuduna molemomoga olamele akuma korokomolayo," nirimu.

Galletiye 5:24 "Koraitige yabomane kalukonopu kepe yama melemele konopuma kepe uju perana toko kojikimili," nirimu.

I Pira 2:24 Yuyuni yuga kaluna olioga ulu pulu kerime lipe meba purumu. Yu ujuna kolorumuni olio ulu pulu kerime naa abolopolie, yabo kololi none tepo molopolie, ulu pulu tubi nili abolamili.

ALIELI MOLOLI ULU PULU KAMU LIGI

Jane 3:14, 15 "Mosesene wabiyemo kolia ku lelina topa uku torumu akumele, Yabomoga Malomo toko uku togemo yabo namelene yu pilkulie, tege tigiliemo keru naa lege nakolo, mololi ulu pulu kamu ligi," nirimu.

Jane 5:24 Jisasene nibelie, "Na enedo tikubu nikiru. Yabo namelene naga ugu pilikulie, na mudurumumu kinie tege tikimilimaga kamu mololi ulu pulu lekemo. Yabo akuma mogo naa ligi nakolo, kololi ulu pulu muduku kelkolie, ogo mololi ulu pulu ligi," nirimu.

Roman 6:23 "Ulu pulu kerimuni mele kalolemomo kololi ulu pulu kalemo nakolo, Mini Pora Pulimuni melema we tilimo. Yuni kamu mololi ulu pulu tilimo. Ene Koraiti Jisase, olioga Ailimu kinie teluna pukumilina mololi ulu pulu ligi," nirimu.

Jane 17:3 Nu tikubu Mini Pora Puli telumu molkono kepe nuni manie mudurunumu Jisase Koraiti kinie pilikimuluna olio kamu mololi ulu pulu likimulu.

Galletiye 6:8 Yabo naene yuga kalumuga lagi ubu mele tolkaje pe kamu keru leli ulu pulu akupe libe nakolo, yuni Mini Kape Telimuga lagi ubu

mele tolkaje pe Mini Kape Telimuga kamu mololi ulu pulu akupe libe.

Jane 3:36 Naene Gotega Malomo tege tipe molkomomo kamu mololi ulu pulu likimu. Naene Gotega Malomo tege naa tipe molkomomo mololi ulu pulu naa libe. Gotene yabo akumu mumi-dilini kolkomo.

GOTENE OLIO TEPA LIKIMU KAPOLA PILIKIMULU

Jane 14:21 "Yabo namelene naga llowama abo-lko tege pajigi yabo akuma na Jisase konopu mojikimili. Naga Lapamone na konopu mojikimili yaboma yuni konopu mojikimu. Nane peala yabo akuma konopu moji pulie, na nanu yabo akumado lipu ora tibu," nirimu.

Romane 8:16 Mini Kape Telimuni olioga minimu kinie nigu tikulie, "Olio Gotega kagabolama molkomolo," nigu tikibilina olio pilikimulu.

I Jane 3:18, 19 "Naga kagabolama. Konopu mojili ulu pulu akumu ugumuga kogono molo kere pudumuga kogono midi molo. Pa tikubu. Olio ulu pulu mare tekemolomaga kogono pekemo. Akitipe pemulie mo olio pilipulie, ugu yuma abolkomolo nibu kapola pilimulu. Akinie olioga mudu mogo yu kinie purele nibe," nirimu.

Galletie 4:6 Ene Mini Pora Pulimuga kagabola molkomele, piliegi, nibe yuga Malomoga Minimu enega mudu mogona mojikimu. Malomoga Minimuni Gotedo "Tara, Tara," nilimo, nirimu.

Aisea 32:17 "Ulu pulu tubi nili kape teli abologiliemo, ene kapola taka leko mologe. Enega konopu purele nibe Ene Gote kinie kapola kamu tege tiku mologe," nirimu.

I Jane 4:13 Mini Pora Pulimuni yuga Minimu oliodo tikimuna olio yu kinie tukudu molkomolo kepe yu olio kinie tukudu molkomo, pilikimulu.

KORAITI OLIO KINIE TUKUDU MOLOPALIE, KONOPU PEAGA TIKIMU

Jane 17:13 "Kinie na Gote nudu okoro nakolo, na ya mana molgoro kinie na ugu nilio mele nikiruna yaboma naga konopu peaga enega mudu mogona oba peke tipili, nibu nikiru," nirimu.

Aisea 12:3 "Ene konopu tikulie, loyekolona tepa lili no molkomomo kolko noge," nirimu.

Romane 14:17 Gotega pege mumu teli ulu pulumuga pulumu lagi kepe no mele kepe molo nakolo, pulumu ulu pulu tubi nili, purele nili, konopu tili, akupoko Mini Kape Telimuni pajikimuna pekemo.

Gelleti 2:20 "Na Jisase kinie uju perana kolorudu. Na molgoro nakolo, na midi naa molgoro. Koraiti tukudu molkomo. Na mana kaluna molopolie, Gotega malomo tege tipu molgoro. Jisasene na konopu mojpelie, yu naga kolojirimu," nirimu.

Ipitie 3:17 Ene Koraiti tege tigi kinie yu enega mudu mogona moloba.

Konana 16:11 "Nuni nado mololi ulu pulu aulka akumu liku ora tini. Nu na kinie molkono kinie naga konopu paa peaga pekemo. Nuga ki ubukuduna ulu paa komidime kamukamu lekemo," nirimu.

Jane 15:11 "Naga konopu peaga ene kinie pepili kepe enega konopu ne nopili, nibu ugu ime enedo nibu tikiru," nirimu.

AILIMUGA UGU TEGE PAJIEMILKO!

II Teselloni 1:7-9 Olioga Ailimu Jisase Koraitini epena kolia mudupa kelepa yu kinie yuga ejollo paa todoloma kinie tepe alibelu melena oba mona molopalie, enedo mogo liku tikimilimedo yuni pudu toba. Ene kodili nipili, nibe teba. Akinie Mini Pora Pulimu kinie naa pilikimilime kepe olioga Ailimu Jisase Koraitige ugu

peaga tege naa pajikimilime kepe mogo lipe tibe. Yabo akuma kamukamu keru leko Ailimu molemo koliana naa molkolie, yuga pege mumu teli ulu pulumu naa kanoge.

Llowa 11:26-28a Pilieyo! Kinie walemoga nane enega kubikerena ulu pulu talo notijikiru. Te tiewe ajilimo ulu pulu; Te ulu mogo lipe tilimo ulu pulu. Gote enega Ailimuga llowama tege pajigiliemo, tiewe ajibe. Gote enega Ailimuga llowa tege naa pajigiliemo, ulu mogo lipe tibe.

I Semeoll 12:15 "Ene Ailimuga ugu tege naa pajikulie, Ailimuga llowama taka togiliemo, Ailimuni ulu mogo enega lanielidu ou tirimu mele enedo tibela," nirimu.

Romane 6:16 "Ene naega ugu tege pajikimili yabo akumuga kedemade yabo molkomelemo pilikimili. Ene ulu pulu kerimaga kedemade yabo mele mologiliemo, kologe nakolo, Gotega ugu tege pajigiliemo, ene ogo tubi nili mologe," nirimu.

KORAITI OLIOGAMO NIBU TIMULU ULU PULU LEKEMO

Pillipie 2:11 "Mini Pora Puli olioga Lapamoga ibi ola pepili," alibelu pepeamane nigu tikulie, "Jisase Koraiti Ailimu," nigi, nirimu.

Mateyu 10:32-33 Yabo naene we yabomaga kubikerena agilipelie, "Koraiti naga," nibe yabo akumu nane naga Lapa muluna ola molkomomoga kubikerena agilipulie, "Yabo akumu naga," nibula nakolo, yabo naene yabo lupamado nibelie, "Koraiti naga molo," nibe yabo akumu nane naga Lapa, muluna ola molkomomodo nibulie, "Yabo akumu naga molola nibu," nirimu.

Lluku 9:26 "Yabo namelene na kepe naga ugu kepe, yaboma piliegi, nigu mane naa tikulie, olie polko we mologiliemo, Yabomoga Malomone yuga ibi aili pa teli lipe yuga Lapaga todolo pajipe ejollo kape telime kinie oba kinie, yabo akuma yu kanoba kinie olie tebala," nirimu.

Romane 10:9-10 Nuga kerene, "Jisase naga Ailimu," nigulie, nuga konopuna pilkulie, "Gotene Jisase loporopa ola lijirimu," nigu pilinuliemo, Gotene nu tepa libe. Yaboma enega konopuna Jisase tikubu nigu akumuni tojikimu kinie ene ogo tubi nigi. Ene keremone ugu akumu nigu tigi kinie tepa lili ulu pulu likimili.

I Jane 2:23 Yabo naene Malomo kinie ugu taka tomuliemo, Lapamo kinie naa molemola nakolo, yabo naene Malomo kinie tikubu nibe pilimuliemo, Lapamo kinie pea molemo.

SETENE OLIIGA OPA TOU PULUMU

I Pira 5:8 Enega opa tou, Setene, kogi llaenemene kau nigu yabo nogedo adoko korolemelemele tepa adopa molkomo kene, ene mogo makiliku kanoko molayo.

Mateyu 4:1, 10, 11 Pe Mini Kape Telimuni Jisase lipe meba kolia ku lelina pupalie, Setenene mada lepili, nibe meba purumu. Pe Jisasene yudu nibelie, "Setene nu aju pa! Ugu imu bokuna toli molemo. Gote enega Ailimu midi popo tokolie, yuga ugu midi pilieyo, nilimo," nirimu. Pe Setene Jisase mudupa kelepa purumu kinie ejolloma ogo Jisase nokorigi.

II Teselloni 2:9 Ye Keri te obamo Setenega kogono. Yu oba kinie ulu todolo tepa yaboma kapola naa telemele uluma kolo topa teba.

Ekese 26:18 "Yabomane mogo makiliku ene topele tokolie, tubulu toli ulu bulu tiku pa teli ulu kanoko molagi, nuni aku tejieni nibulie, nu mudukuru," nirimu. Ene Setenene nokorumumu muduku kelkolie, "Na Gote kinie molagi," nibulie, nu lipu mudukuru. Na tege tiku mologe kinie nane enega ulu pulu kerime kanopo kode tebo. Pe ene naga ou liridu yaboma kinie mologela," nirimu.

Ipitiene 6:11 Setene oba kodi topa mada lekemo kene, ene todolo muduku agilieyo. Gotega opa kunama pepea pajiku molayo.

OLIONE KAPOLA SETENE TOPO TAGOJIMULU

Jemese 4:7,8a Ene Mini Pora Pulimuga maniekodo molayo. Setene oba kinie kubi teayo. Aku tege kinie ene mudupa keleba. Ene Gote molkomona nodoko payo. Akinie Gote ene kinie oba nodopa moloba.

Iperu 2:14 Yabomaga ubu telumuga kagabolama meme kepe kalu kepe telu mele pekemo. Akuti-pe mele Jisase olioga meme kalu lirimu. Lipe-lie, yu kolorumumuni Setene kololi ulu pulu notirimumuga todolomo topa elke torumu.

Romane 8:35 kinie 37 "Olio Koraitige konopu mojili ulu puluna molkomoloma mele nabolkamone olio wedo libe. Arage nibu midili nomolo ulu akumane kapola tebae? Molo ulu mogo tigi kepe, egele leba kepe mulu wabale naa leba kepe, toge tege kepe, louni toge kepe, ulu akumane kapola tebae? Molo! Jisasene olio konopu mojikimu kene, ulu ime pepeamane olio wedo ligi kapola molo. Olione ulu akuma pepea topo tagojipu molkomolo," nikimu.

II Teselloniye 2:8 Pega Kerimu mona moloba. Jisase Ailimuni yuga kere mulumuni ye akumu kamu tepa kejibe. Jisase oba kinie pa tejibemone kerimu topa kojibena, yu pora nibe.

I Jane 3:8 Ulu pulu keru telemo yabomo yu Setenega kagabolare. Setenene ulu pulu kerime pulu mojipe terimu. Mini Pora Pulimuga Malomone Setenega ulu puluma topa kojibedo orumu.

KONOPU MOJIKIMILI ULU AKUMU JISASEGA LOBILI PULIMILIMAGA MAKO MELE PEKEMO

Jane 21:16 Jisasene altopa wale talo tipe waltipelie, "Saemone, Jonasega malomo, nuni na konopu mojikinui," nirimu. Yuni yado nibelie, "Tike Ailimu, nane nu konopu mojikirumu, nu pilikinu," nirimu. Yuni aju nibelie, "Naga tipitipime lagi tieni," nirimu.

I Koridi 13:1 "Na yabo kepe ejollomaga alibelu ajipu ugu nilke nakolo, yabo konopu naa mojikije, melema kerolo-parolo nilimu mele na ugu midi we nilke," nirimu.

I Jane 3:14 "Olioga agenupilime konopu mojikimulumuni olio pilipulie, kololi ulu pulu mudupu kelepo mololi ulu pulu likimulumu, pilikimulu. Yabo tene yuga agenu konopu naa mojimuliemo, kololi ulu puluna molkomo," nirimu.

I Jane 4:20 Yabo tene nibelie, "Nane Gote konopu mojikiru, nilke nakolo, yuga agenu konopu naa mojikije, yabo akumu kolo tolemomo. Yuga agenu yuga mogone kanolemomo konopu naa mojikije, Gote yuga mogone naa kanolemomo nabepa konopu mojikije," nirimu.

Gelletie 5:22-23a Mini Kape Telimuni puruti mogo itipe mele tolemo. Konopu ne nokomo, purele nikimu, kanoko kode telemele, adiki telemele, konopu mojikimili, taka leko molemele, molko kojikimili ulu akuma, Mini Kape Telimuni mogo tolemo.

Jane 13:35 Ene yabo yagonoma konopu mojikilemo, yabo pepeamane ene kanokolie, "Jisasega lobili akili lemelema lemo," nigu piligi.

JISASE KORAITI LOBOROPA WEDO ORUMU

Mako 16:9 Koro aili kinie paa ipuleli ou Jisase loboropa wedo obalie, Makatalla Meriye yu ou 7 mini kerime lipe ele tejirimu abo akumukinie, ou pupa lipe ora tirimu.

Jane 20:26-28 Wale 8 oba purumu kinie yuga lobili akili lerigima Tamase pea ulkana tuku molorigi. Molorigi kinie nabunama tili pepili Jisase oba tukutigina agilipelie, "Enega konopu

purele nipili, " nirimu. Pe yu Tamasedo nibelie, "Nuga kimuni naga ki abolko kanani. Nuga kimuni naga waguna abolko pilieni. Ugu naa pili-kinumu, keliani. Na tikubu, konopu tieni, " nirimu. Tamasene aju nibelie, "Naga Ailimu, naga Gote" nirimu.

Romane 4:25 Olio llowa topo pula torumuluna Jisase toko kojirigi. Olio tepa tubi tibedo yu loloropa kelepa wedo oba molorumu.

Ekese 10:39-41 Jisase Ju yabomaga kolia kepe Juruselleme nibe koliamaga yu ulu terimuma pepea olione kanorumulu. Pe yemane Jisase uju perana toko kojirigi. Wale 3-tipe kinie Gotene Jisase loloropa ola mojpelie, mona lipe ora tirimu. Yabo pepeamane naa kanorigi nakolo, Gotene kanagi ou lirimu yaboma olio kepe, yu kolopalie, pe loloropa wedo oba olio kinie lagi kepe no kepe pea nobo molorumulumado lipe ora tirimu.

PE OLIO LOBOROPO WEDO OMOLODO MOLKOMOLO

Mateyu 16:21 Akinie yadopa Jisasene yuga lobili akili lerigimedo itipe nibe para tipe molorumu. Yuni nibelie, "Na Jurusellemedo pubu. Pubu kinie ye ailime kinie Jumaga ala ye ailime

kinie llowa mane tilimene ulu atili teko na midili kojikulie, pe na toko kojigi. Wale 3 tipe kinie Mini Pora Pulimuni na loloropa ola moji-be," nirimu.

Romane 6:3-5 "Olio no lirimuluma Koraiti Jisase kolorumuna no lirimulu naa pilikimilii? Yu kolorumu mele olio no liku ono terigi. Pe Lapamone todolo mudupalie Jisase loloropa ola lijirimu, aku tipe mele olio kinie kode adopo molkomolo," nirimu. Olio Jisase kinie kolorumu mele akutipe olio Jisase kinie loloropo ola kode molomolo.

Jane 5:25 kinie 28, 29 "Tike, nane enedo paa tikubu nikiru. Pe wale wedo obamo, kinie leke-mo. Yabo kololime Gotega Malomaga ugu piligi. Piligime kode mologe... ugu ime pilkulie, pugupugu naa nieyo. Wale obamoga ono koliana pelemelema yuga ugu pilkulie, wedo oge. Ulu pulu peaga terigimene loloroko ogo mololi ulu pulu ligi. Ulu pulu keru terigimene loloroko ogo ulu mogo pulumu kamu ligi," nirimu.

AILIMU MOLKOMO KENE OLIO KAPE TELI MOLAMILI

I Pira 1:15 Ene waltirimumu kape teli molkomo kene, Yu molkomo mele enega ulu pulu pe-pea kape teli pepili.

Ipitene 1:4 Ma kolia pulu mojipe ou mimi naa terimu kinie Gotene olio Jisase kinie koro makome torumu. Olio makome topa lipelie, ulu mogo naa pepili, kape teli molkolie, yuga mogo palana molagi, nibe ene konopu mojimona, molagi nibe lirimu.

II Koridi 7:1 Gotene enedo i tebo i tibu nirimu uguma pilikimulu kene, naga agenupili konopu mojilioma olioga kalu kepe mini kepe tepa kalaro mojibe melema pepea kulu topo ele teamili. Ele tepolie, olio Mini Pora Pulimu pipilini kolopolie, ulu kape teli midi tuku pupu abolamili.

II Timoti 2:21 Yabo tene ulu pulu keru akuma topa manie mudumuliemo, pe yu Ailimuga mele peaga kape teli lebana, yu lipe abolopa yuga kongo kepe i mele ya melema kapola teba.

I Pira 1:2 Mini Pora Pulimu olioga Lapamone ene koro makome torumu. Mini Kape Telimuni Gotega mogo palana ajirimu. Ene kape teli molagi nibelie, Jisase Koraiti yuga mememone enega odo lejirimu.

I Jane 1:9 Olioga ulu pulu kerime nibu para timululiemo, yuga mogo agilikumuni olioga ulu pulu kerime kanopa kode teba kene, olio yu tege tiemili.

Aisea 35:8 Aulka anumu te leba. Aulka akumuga ibimu kape teli aulka. Kalaro mololi yaboma aulka akumuga naa pugi. Piliku tubi naa tili yaboma aulka akumuga wapokodo kapola naa pugi; kapola pugi.

Iperu 13:12 Akumuni Jisase pea pala ultukudu pupalie, yuga mememone yaboma kulu topalie, Gotega mogo palana ola mojobedo midili norumu.

Mateyu 3:11 "Nane ene topele tagi nibu ene no lijikiru nakolo, na kinie nae akili lepa obamoga todolo ogojipe lemona, nane yuga moko tu wedo lijibu mele kapola molo. Ye akumuni Mini Kape Teli kinie tepe mele kinie lipelie, ene no lijibe," nirimu.

Lluku 1:74,75 Olioga opa toumane olio lirigina pilipelie, pe yuni olio wedo libu nirimu. Wedo lipelie, "Ene pipili naa kolkolie, na popo tayo," nirimu. Pe ene mologe walemaga pepea yuga kubikerena molkolie, kape teli tubi nilimu mologe.

MINI KAPE TELI LIKIMILIME

Ekese 13:52 Ene lobili akili lerigime konopu tiku molkolie, Mini Kape Teli ene kinie peke lerimuna molorigi.

Romane 8:9 Gotega Minimu enega mudu moga molomuliemo, ene kalumoga mele konopu naa pajigi nakolo, Minimuga konopu pajigi. Yabo tene Koraitiga Minimu naa limuliemo, yabo akumu Koratige paa molo.

Itikielle 36:27 "Nane naga Minimu ene kinie tukudu mudubumuni naga llowama abolkolie, naga ugu puluma ene pilku kogojiku tege pajigi," nirimu.

Lluku 11:13 Ene ulu pulu kerime abolkomele nakolo, enega kagabolamado mele peaga tili-mili. Enega Lapa muluna ola molkomomone yudu waltikimili yabomado paa ogojipe Mini Kape Teli tibe.

Ekese 4:31 Ene arega torigi kinie ene liku maku torigi kolia lope-lope terimu. Mini Kape Teli ene kinie oba peke tirimu. Peke tirimu kinie Mini Pora Pulimuga ugu todolo muduku nigu tirigi.

Ekese 1:8a "Mini Kape Telimu ene kinie oba kinie ene todolo ligina naga ugu nigu tigi," nirimu.

GOTENE UGU PILILI YABOMADO, I TEBO I TIBU, NIRIMU UGU PEAGAWE LEKEMO

I Pira 4:12-13 "Na konopu mojikiruma midili noli ulu pulu oba ene mada leba kinie ene turu naa nieyo. Ulu pulu naa telemomo kinie tekemo nigu naa pilieyo. Nakolo Koraiti midili norumu-mele olio pea midili nokomolo, nigu pilku konopu tiku molayo. Aku tegemane yuga ibi ola peba wale akinie enega konopu pea ne nobana ene konopu tiku mologe", nirimu.

Konana 37:3 Ene Ailimu kinie tege tikulie, ulu peaga teko molayo. Aku tegemane enega koliana kapola molko kojikulie, lagi nogo mologe.

Konana 34:18 Ailimuni yaboma paa kodo pulu kolemelema kinie nodopa molkomo. Yuni kame-lena midili pilikimilime tepa lilimo.

Aisea 66:2 Ailimuni nibelie, "Naga kimuni i mele ya mele pepea tepo mimi teridumuni mele akuma pepea naga" nirimu nakolo, "Ye tene adiki tepa kodo kolopa molopalie, naga ugu pilipe pugu pugu nilimo ye akumu na kanopo ajikiru," nirimu.

Repellete 21:4 Mini Pora Pulimuni yabomaga kolama mogona pekemoma kulu toba. Akinie yabo naa kologe, kodone naa kologe, kola naa

tege kepe, midili naa noge. Akinie ulu pulu oukudu pora nibe.

SETENENE KODI TOLEMO YABOMA PILIEYO

I Koridi 10:13 "Kodi tolemo ulu pulu pilinoma we yabo pepeama pea pilikimili. Ene Gote kinie kapola tege tiku mologe. Nu kodi topa lipili naa nibe nakolo, kodi toba kinie nuga yore leko puni aulka aki tipe taltobana nu kapola ogo puni," nirimu.

Iperu 2:18 Setene yu kodi torumu kinie yu midili norumumuni yaboma kodi tolemo kinie Jisase todolo kapola tilimo.

Romane 16:20 "Gote konopu purele nipili nilimomone ene Setene kulagi nibe todolo tibe kinie nodoko Setene kulugi", nirimu.

Aisea 43:2 "Ene nomuma pula toge kinie na ene kinie molobo. Ene no oba pulimona pula toge kinie ene none naa libe. Ene tepe noba pekemo koliana pugi kinie tepe naa noba kepe, enega kaluna naa peba," nirimu.

Romane 8:28 "I ulu ya ulu pepeamane oba Gote konopu mojikimilimedo kepe, yuga konopu mo-jilimo teagi nibe lirimumado kepe, tepa peaga telemo, pilikimulu," nirimu.

Konana 34:19 "Tubi nigu molkomele yaboma midili ubu kade nolemele nakolo, Gotene walemaga pepea nokolemo," nirimu.

SETENE OLIO MADA LEBA KINIE GOTENE NOKOBA

Repellete 21:7 "Yabo naene Gotega talapena mololipe pupa winime temuliemo, yabo akumu naga kagabola moloba. Na yuga Gote molobo. Naga melema pepea yu libe," nirimu.

Repellete 3:21 "Na nanu winimu tepolie, naga lapa kinie kigimuga polona molorudu mele, ene winimu tegema na kinie kigige polona mologe," nirimu.

Repellete 3:5 "Mada mologema maminie kake pajiku mologe. Enega ibima mololi ulu pulu bokuna molobama kulu naa tobo nakolo, nane enega ibima naga lapa kinie yuga ejollomado nibu tibu," nirimu.

Repellete 3:12 "Mada mologe yaboma nane lipulie, naga Gotega ulkamoga timu ajibu mele. Yu kelepa ultu naa puba. Nane yabo akumuga kaluna Gotega ibi topo naga Gotega taone Juru-selleme kode Gote moloba koliana mudupa kelepa yado obamoga ibi topolie, pe naga ibi kode yu kinie topo mojibu," nirimu.

Repellete 2:7 Ene ugu piliebo nigu komu tapola tikimilimene Mini Kape Telimuni llotu yabomado nilimo ugu akumu pilieyo. "Nane ene mada mologema mololi ulu pulu uju mogo nayo, nibu. Uju akumu Mini Pora Pulige kolia peaga tukutigingina agilikimu," nirimu.

GOTENE NIBELIE, ABO LIKU MUDUKU KELEMELEMADO NIRIMU

Mateyu 5:32 Nakolo nane enedo nibulie, "Ye naene yuga abo menu ye lupa kinie ulu kerinele naa teli we makoromuliemo, abo akumu pamoka molopili, nibe tekemo, Ye naene abo akumu limuliemo, yu pamoka mele molobala," nirimu.

Lluku 16:18 Naene yuga abo menu makoropalie, abo lupa limuliemo, ye akumu mariti llowa pula tokomo. Akumu kepe naene yuga yemo we molopili abo akumu limuliemo, mariti llowa topa pula tokomo.

Romane 7:2,3 Llowamone ye purumu abo moloba walemaga pepea yuga ye kinie moko toli molemo. Yuga ye kolkaje llowamone naa moko toba. Akumuni yuga kubi lepa purumu ye molopili ye lupa pulkaje abo akumu abo pamoka nieyo. Nakolo yuga ye kolkaje, yu kapola wedo pupa ye lupa pumuliemo kapola, yu pamoka naa moloba.

I Koridi 7:10, 11 "Abo lili, ye pulimado i teyagi, nikiru nakolo, nanuni naa nikiru. Ailimuni nikimu. Ene aboma enega yema muduku naa keliayo. Nakolo tene mudupa kelemuliemo, alto-pa ye naa pupili, we midi molopili, molo yuga ye kinie kelko kopu tepa pupili. Yemane enega aboma naa makorayo," nirimu.

JISASE KELEPA OBA

Jane 14:3 "Na akuna pupulie, enega kolia mimi tebedo puduliemo, na kelepo obo; ene na kinie libu. Aku tepolie, na molobone ene pea molo-ge," nirimu.

Mateyu 24:27 "Kolia pilkilimu mele Yabomoga Malomo aku tipe mele oba," nirimu.

Repellete 3:11 "Na itili obo kene, abolkono melema igi tiku aboloyo. Yabo tene lupa nuga naba naa lipili," nirimu.

Mako 8:38 "Kinie wale ulu pulu keru telemelema kepe Gote yu muduku kelkolie, Gote lupa kinie pulimilime," nirimu. "Kinie wale molemele yabo naene molkolie, na kepe naga yabo kanopa olie polomuliemo, pe Yabomoga Malomo yuga Lapaga ibi aili yuyu lipelie, ejollo kape telime kinie yado oba wale kinie yuni ye akumu kinie kubi tepa kanoba kinie olie tebala," nirimu.

Lluku 21:27 "Pega Yabomoga Malomo kupana ola molopalie, todolo ogojipe kepe paa teli ulu pulu kinie obana kanoge," nirimu.

Lluku 12:40 Yabomoga Malomo kinie walemoga naa oba nigu walu tiku mologe kinie oba kene, ene nokoko kanoko kogojiku molayo.

I Jane 3:2 "Naga ka lelime olio kinie walemoga Gotega kagabolama molkomolo. Olio pe molomolo mele kinie morekena naa lekemo. Nakolo, Jisase oba kinie yu molemo mele kanopolie, olio aku tipu molomolo.

Mateyu 16:27 Yabomoga Malomone yuga Lapa-ga pa teli kepe ibi aili lipe yuga ejollo kinie oba. Akinie yabo yumelemelemaga kogonoma pilipe ibi tipelie, mele kaloba.

Repellete 16:15 "Pilieyo. Wa noli yema ole-mele mele obo nakolo, yabo naene 'melemaga mimi tepolie, olie naa polobo' nibe pilipelie, mogo maki lipe molomuliemo, yabo akumu konopu peaga peba," nirimu.

Ekese 1:11 Eltene nigululie, "Gellooli yema ene nabemuna ola agilikulie, muluna olado tiku kanokomele? Jisase imu telumu, kinie ene mudupa kelepa Gote molemo koliana pukumumu, yu pukumu mele kelepa oba," nirigili.

Jemese 5:8 "Ene taka leko molayo. Konopu todolo pajiku molayo. Ailimu nodopa oba," nirimu.

Mateyu 24:30 "Akinie muluna ola Yabomoga Malomo adi oba nibe mako te wedo oba," nirimu. "Mana molkomele yabo pepeamane kola tekolie, Yabomoga Malomo muluna ola kupana molopalie, todolo ogojipe kepe pa teli ulu pulu todolo kinie obana kanoge," nirimu.

MINI PORA PULIMUGA UGU

II Temote 3:16 Gotene ugu tirimuma, bokuna toli molkomo pepeamane kapola ugu tikubu mane tipe, we ugu karaye telime taka topalie, yabomoga ulu puluma tepa tubi tipe ulu pulu tubi nili lipe ora tilimo.

II Pira 1:21 Ou koro lupa yemane enega konopuna midi pilkulie, ugu todolo mane naa tirimu. Mini Kape Telimuni konopuma tirimuna ye kape telimane Gotega ugu pilkulie, nijirigi.

Konana 119:105 "Gote nuga ugu tepe llame mele, naga moko kabi libu pubu aulka pa tejilimo", nirimu.

Konana 119:11 "Nane nuga ugu kapola naa topo pula tabo, nibu nuga ugu naga mudu mogona pajikiru," nirimu.

MINI PORA PULIMUGA UGU

Romane 8:9 Gotega Minimu enega mudu moga molomuliemo, ene kalumoga mele konopu naa pajigi nakolo, Minimuga konopu pajigi. Yabo tene Koraitiga Minimu naa limuliemo, yabo akumu Koratige paa molo.

Itikielle 36:27 "Nane naga Minimu ene kinie tukudu mudubumuni naga llowama abolkolie, naga ugu puluma ene pilku kogojiku tege pajigi," nirimu.

Lluku 11:13 Ene ulu pulu kerime abolkomele nakolo, enega kagabolamado mele peaga tili-mili. Enega Lapa muluna ola molkomomone yudu waltikimili yabomado paa ogojipe Mini Kape Teli tibe.

Ekese 4:31 Ene arega torigi kinie ene liku maku torigi kolia lope-lope terimu. Mini Kape Teli ene kinie oba peke tirimu. Peke tirimu kinie Mini Pora Pulimuga ugu todolo muduku nigu torigi.

Ekese 1:8a "Mini Kape Telimu ene kinie oba kinie ene todolo ligina naga ugu nigu tigi," nirimu.

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: www.wmp-contacts.org.**

Ugu ime Watson Goodman nibe
ye lipe apurupa topa tikimu

Boku imu we liegi - Pame tege molo



World Missionary Press
PO Box 120
New Paris, IN 46553-0120 USA
www.wmpress.org

Read booklets online or by App
www.wmp-readonline.org